

出使美日秘國日記

出使美日祕崔日記

七月初一日 大吉晴

發電與總理衙門爲日國駐華之署理公使無日廷文書之事也
電文云阿應前任帶見例無文外部懇接待新使將到因 日本
神戶報言俄國駐朝鮮之公使奉俄廷之命於朝鮮求界一口岸
以爲俄國之用朝廷拒之 因謹按俄人之覬覦中國東三省可
見矣卽於垂涎朝鮮口岸見之也中俄交界之曠地三百年來俄
人以混界佔之每勘界一次中國必失地數百里昔之索倫勁兵
地方今已入於俄矣俄固不費兵力也朝鮮口岸必無可混則以
君命求之求之而得則陸軍可以轉運水師可以添煤添水於數

萬里之外而得一屯兵之區何異攻敵之平行壘也

泰西兩軍對敵其攻營者

往往築平行壘其製造近敵營壘土石與敵營齊則敵營不能守

幸朝鮮不允也易曰履霜堅兵

至過此以往俄人之心其未已乎

初二日晴

二十六日照會外部之文茲接外部覆文云已收到卽照戶部俟戶部覆文云云 近來美國留意海防需用大礮因將各國所造大礮試驗比較查英國新造兵艦名域多利阿者有大礮數尊每尊重一百十噸長四丈三英尺零九寸口徑十六英寸四分寸之一係英國紐加司爾埠安司脫郎廠所造每造一尊成至速須十五箇月受火藥九百六十磅鋼彈重一千八百磅每放一次

金一百七十七磅現在所有各國鐵艦礮臺均可洞穿惟放至七十次則有炸裂之虞 因嘗謂礮可加巨而鐵甲不能加厚者至是信矣如以二百噸之礮能洞穿四五尺厚之鐵甲則鐵艦豈敢攻礮臺乎

初三日 晨起大霧辰刻霧消日出

接總理衙門文書知會匪鬧教已奏奉

上諭矣所願各督撫實力奉行庶會匪可靖而中外無事也 又接南北洋暨蘇松太道文書以華商所領來美之護照美國稅關以爲有弊故仍留難已據文照外部矣

初四日 晴夜雨

越南東京西報云前由福關東築至諒山之鐵路今近福關東首
一站業已告竣往來利便可使地方安靖且沿鐵路兩旁不墾之
地今以火車遷其農人載運農器可以開荒易草萊爲稼穡又中
越交界去年經中法兩國派員帶兵會勘分界尙有近山之地未
立界石者約六七百里野人居多野人所售之鴨購而烹之其腸
中必有金沙蓋因金礦由水流出之沙爲鴨所食故也此礦在中
國界上法人欲之故界不能遽定云 因謹按墾荒開礦均天地
自然之利也越南人冥然罔覺致啟法國垂涎今則鐵路日開荒
地漸闢而礦沙亦露混沌鑿破同於阿洲惜乎越人祕其藏而貽
法人享其利也

初五日晴

祕林海峽捕海龍案西歷八月四號該峽來電前美國漁船七艘在英屬海之衣斯巴埠違例捕漁爲英兵船臺列母所獲由英員審問該漁船供實因大霧不辨海面界限致誤越界並非有心英員以其言尙近理釋之 因謹按祕林一案英之處美較美之處英爲寬非怯也其爲用心之深有待而發歟其爲交鄰之厚有怨則忘歟要之勢之強者顯用其勢不如隱示以勢使之相喻而有所懾且市以德則易就我範圍而我又可以博仁人君子之名此英之作用也

初六日晴以上三日均大熱

本日新報載法國來電稱外部大臣准於本月底往瑞士國避暑
俄國外部大臣亦因避暑赴瑞士遂約相晤雖未聞何故料其皆
赴瑞士似因約定必爲國事起見云 因謹按從前法君拿破崙
第一曾約合俄以混一各國乃因無信先欲圖俄遂至寒盟法人
加師於俄俄之木司科都城自焚以清野法人無所棲止無可掠
食八十萬人傷亡殆盡其得歸者只萬餘耳拿破崙遂敗事今俄
與法其國皆佳兵其君皆好戰如果深相交結歐洲難保昇平矣
初七日晴大熱寒暑表升至九十五度未刻暴雨大風雨過仍晴
德國來電云近日德國政府請歐洲各國會盟訂立通商稅則同
盟諸國均須照商定之稅則抽稅以昭畫一惟所請之國俄法兩

國不與蓋疑德國此舉爲制己也茲聞德廷本意實因美國近增稅則所有歐洲各國貨物運入美國各口者抽稅比前較重故聯盟各邦以定稅則相報云云 因謹按觀此而知稅則爲各國內政他國不能置議也美增稅則歐洲各國雖不願而無能與駁詰者亦只能以增稅報之而已墨西哥已行之矣此其可證者也因又觀此而知交鄰之意不可不講也德欲聯盟以增稅報美各國皆從而俄法不與者法與德憐俄與法密也歐洲各國之君歲時晤見如古之覲遇朝宗焉固通情好亦懼齟齬也細針密縷願細心者共體會焉

初八日 晴大熱未刻暴風小雨仍晴

倫敦來電言法國有兵艦一隊不日開往俄國之克龍士達埠海面以意度之當是與俄之兵艦合操也 因謹按此當係局外揣測之辭然而形迹固可疑也歐洲各國如德如義如奧及諸小國其畏俄法之橫恣皆利害切身也卽英之水師甲於地球似可不慮然俄與法合則兩國水師之力實足勝英英亦安能自恃比權絜力遠慮深思蓋均不能不自危矣

初九日晴

是日赴美國國家銀行與美紳某相遇因作寒暄并詢中國民人滋毀教堂一案因答以我

國家風行雷厲匪人現已斂迹某謂亞洲形勢俄處其北南臨中

國印度等國志在鯨吞茲又擬築火車鐵路環繞中國印度各國直達太平洋海濱不久可成英國雖強亦懼其侵印度開業與中國聯盟信否因答以未聞某謂會匪滋擾教堂一事各國駐華公使均求竭力保護惟英公使不甚著力殊不可解或者英國別有所求於中國故不欲以勢迫也因曰此聞所未聞也容查之遂散

初十日

晴是夜丑刻大風雷雨

金山來電又以去年金山稅關所定之護照由洋人簽名准其回華後仍准來美此次又援戶部文附會不准復來而去年持此種護照回華者已有三四千人忽然改章均不能返請爲設法已電律師科士達矣因嘗讀呻吟語云兩人相信形迹皆土苴也如

不相信形迹亦土苴也美之上下無不願以禁工媚工黨中國無論如何應付均非美之所願必至華人不來而後快心護照會何益哉

十一日晴

申正接總理衙門電云密中倫敦來電美派水師一軍赴華以防鬧事查美教在華均安輯現惟英法教案刻已次第了結美國此舉確否希詢外部卽電覆真此時外部衙門已散明日又爲西曆禮拜遂定於十三日往見外部 因查咸豐十年之役英人以焚燒鴉片構釁而各國亦附和之蓋其合兵以事挾制自昔然矣此次會匪所毀教堂非盡法國而法乃約各國之兵船以啊喝蓋有

見於庚中之役均得便宜故欲踵其轍也

十二日晴

前日新報言美國邀請中國赴希卡果賽珍會一事美國先有禁止華人來美之例有無干礙赴會之人蓋美國既邀其人前來及其抵美弗與登岸自傷國體有商之外部者外部謂應商之議院因按此所謂名不正則言不順言不順則事不成也賽會者美人之所欲故惟恐華人之不來傭工者工黨之所忌又惟恐華人之來共意兩歧其言反汗中國不詰問而美國乃自詰問外部亦辭窮也而議院可知矣

十三日晴

午刻赴外部衙門外部大臣華頓亦到相見因告以中國曾匪滋事久已救平美國人民無受累者外部答曰亦接到駐上海領事電信已知之矣因又曰聞美國近派兵船一隊赴中國是否尙因教案外部答曰非也美國駐上海之兵船本係舊式久應更換故派兩船瓜代且所派之船仍往檀香山遊歷又往日本然後到中國與教案無涉也因詢該船何時起碇外部曰前二日已有一船開行矣尙有一船仍稍緩則開也因額之遂辭出發電與總理衙門云密申外部言兩船常例巡海無關教案因謹按美國水師之力當無遠略之能但附入各國之羣則可慮耳美國不聯合度歐洲亦必有不聯合者法以一國爲禍首將爲衆論所不直

則亦難悍然行矣

十四日晴

接總理衙門電云函悉經費六月望日由三晉源匯解寒又接北洋南洋文書爲商人持護照來美事又接山東登萊青道盛宣招商局馬建忠交函以十六年六月所交該局之經費銀六萬兩謂爲洋行所倒不能滙撥 因查光緒七年前出使美日祕大臣鄭藻 所撥經費銀八萬兩商局卽援李傅相之奏創爲緩期之說延至十一年始行交清此前事也一之爲甚其可再乎

十五日晴

美國戶部於今年五月創一新例凡華人由金山假道赴古巴者

一上車後卽不得出入自由乃至食物亦由窗門遞入拘束太苛
已商律師科司達告諸戶部此等苛待實爲違約昨日戶部已行
文金山稅關屬令查明停止矣 因謹按美國各國之阻尼華人
自總統以至各員非不知之但託於不知以假手各關行其驅除
之虐以悅工黨耳迨經照會則不得託於不知聊勉強調停而已
非真願也

十六日 晴中夜大雨

外部總辦布郎來見談及昨日巴黎來電云法國近接公文以中
國會匪鬧教一案前此歐洲各國聲明欲合水師交相保護現聞
中國地方官認真彈壓亂黨辦理各案因此各國無須聯合水師

以保護云 因謹按歐洲各國聯合水師以至中華或開釁端此會匪所願望者也今作罷論會匪之計不行矣然厝火積薪其志未逞其種終未除也願綢繆未雨焉

十七日晴

美國各省博學之士現集本都會議昨已在可倫比亞大書院開堂一次查美國博士多在美國大書院充當教習各有所長專門名家如星學化學電學光學氣學之類日窮其理以求其精惟以一人之心究無窮之理恐有不到故約定各博士每年齊集一次各以所得者互相考究以資觀摩庶見聞廣而進益速也 因謹按外國於格致之學較之中國士子之用心舉業者略相同焉然

舉業之學但託空言而格致之學實有實用宜其日致富強乎

十八日晴

是日爲美總統五十八歲生辰各大員均往慶賀 聞俄法兩國有聯盟之議以抵德義奧三國也查德義奧三國軍民之數德國計四十六兆八億奧國四十兆五億義國三十兆合計一百十七兆有餘又查俄法兩國軍民之數俄國九十六兆法國三十八兆合計一百三十四兆分五國爲兩甄旗鼓兵精礮利如有戰事痛鉅創深殊難料矣 因謹按歐洲情形一戰國縱橫之局也弱者合縱以拒強強者連橫以并弱莫敢輕發故有形格勢禁之力莫能相下遂無休兵息民之時國其地者常虞挫創故刻刻以練兵

爲念而遂能自強易所謂亡者保其存孟子所謂生於憂患也

十九日 晴入夜大雨徹曉

昨日新報載倫敦來電謂各國駐中國公使因中國會匪作亂求
中國政府派兵艦赴各處駐防以備後患中國政府允之 因謹
按我

國能弭亂未形而不待外國之請則國體尊矣

二十日 天氣熱大風午刻雨入夜大雷風雨

前聞英廷以法國水師一隊來英擬籌費一萬圓以備款待之用
茲閱新報言十七日倫敦來電法國兵艦已抵英英君主卽偕王
子公爵同往亞斯巴閱兵艦軍容英法兵艦互聲礮示敬下午英

君主設宴醺法提督兵官以示優禮云 因謹按泰西各國極重
邦交非有所畏而然也英之水師勝於法法之水師不如英法艦
至英英君主往見并宴勞有加焉英法比鄰聲勢相應情意之密
卽輯睦之形不特兩國無所齟齬卽他國聞之亦不敢輕意離間
并不敢相侮也

二十一日 陰夜雨

美國近日考究炸藥有一種名安門泥脫者力雖猛而易防久洩
氣而性不變當製造然燒之時亦無意外之虞從前英國舟車載
運炸藥其例甚嚴近試此種炸藥之性並無自炸之患與他種迥
別嗣後運此種者不必照前例嚴辦云 因謹按炸藥之力可以

破敵而每自焚爲其性烈而難防也泰西各國每制一物必取其利而去其害使炸藥無意外之變近日始思而得之儼能使火藥局無意外之變則盡善矣

二十二日陰夜雨

美國富人萬達底於英廠定製鋼身單桅小艇一隻原價銀七萬七千七百五十圓今將船料運美擬至美後拼成美關照戶部所定稅則徵原價四十五分計稅銀三萬四千九百八十七圓五角爲保本國製造廠匠利權防外國攙奪也因謹按此亦美國富政之一端也若英若法若德所需船礮槍械均由本國自製俄則半製半購此五國者皆稱富強而俄之富則遜焉謀國者可知所

取法矣

二十三日晴

美國近以俄之猶太人絡繹來美已知照俄公使與俄政府商議云 酉正接總理各國事務衙門電云十九日奉

旨崔國因轉補翰林院侍讀欽此

二十四日晴

黎明望

闕謝

恩撰謝

恩摺查轉侍讀向毋庸謝

恩以出使大臣許景 曾奏謝故循之 朝鮮公使李采淵來函
云本月二十五日爲國君生辰略設茶會自酉初至戌正請到
法國水師提督卓威統帶水師一軍游弋到俄與俄國外務大臣
相晤茲聞該提督已帶回俄法盟約大意爲互相援助內有一節
言以後中國會匪有騷擾兩國商民情事當互相保護云 因謹
按俄法聯盟似畏人知而出之以機密何也蓋欲操勝算也俄法
二國之水陸二軍與德意奧旗鼓相當若德而聯盟於英則俄法
又似不及故不欲張皇其事使德人防之以求於英且使英人防
之而合於德也

二十五日 陰小雨

酉初至朝鮮使館見美外部總辦英參贊所到之人甚少以均避暑未回也聞朝鮮歸俄國保護如果屬實則又踵越南之轍矣
因謹按朝鮮爲我

國之藩通使各國不得已也亞洲只三國而日本不願與中國唇齒相依時形桀驁愈致歐洲各國輕之因不欲效日本所爲實詩人外禦其侮之意也

二十六日晴

拜發轉侍讀謝

恩招近日傳聞俄法聯盟一事因俄不願而尙未成是否俄人所要求於法者法人未允抑以鞭長莫及不能急法人之急也然二

十四日所聞法國赴俄之提督已至俄國與政府立約并將約寄回矣似確鑿而有據且聽以後消息 因謹按此俄法之機密也俄人數百年來以遠交近攻擴地至二十倍得地球六之一矣非失計也與法聯盟之策亦猶是也亦安有所不願哉

二十七日晴

接總理各國事務衙門來文并報夏威夷國主之書又賞美國駐巴拿馬領事阿丹信之寶星及洋員科敦之寶星照并撥款十萬兩 英國路透局電言俄國報云俄國告知英國如歐洲各邦果有同心聯絡之事則俄國將奪取英國所屬之印度地方云 因謹按俄法之交方合而俄遽欲解散他國之交此可知其心矣英

不與德合則俄人尙有所難爲若德義奧既聯盟而英人又助之則俄人惟有完守入保而已故昌言以解散之也然而此舉實關歐洲昇平之大局英人當自有權衡而非可以啗喝止矣

二十八日晴

英美兩國合議派船查捕海龍一案本日聞有漁船三艘在祕林海俄界私捕海龍爲俄國巡船所見追拿一漁船中彈不能行駛被獲乃美國漁船也其餘二艘已逃出界外云 因謹按祕林海峽禁捕海龍其議創於美之總統本將以禁英人而美人得專其利也繼而英人以理爭之然後議禁英美兩國均不准捕譬之爭訟原告被告均不分彼此矣至於今日美國漁船乃被俄人所獲

向之所以禁人者今自犯之向之所以扣他國之船者今被他國扣之前此美國議紳謂英國以祕林海峽扣船之事控於美之察院爲礙體面今竟何如

二十九日 晴中刻兩

譯致夏威夷國信繙成英文該國公使現避暑歐洲卽寄歐洲
本日新報載美國通至巴西海電工程告竣前此美巴兩國電音往來須由歐洲或由墨祕兩國轉至殊多遲滯此綫既成於公事商務均有益也 聞智利國議院黨戰勝智利總統已出亡實自戕矣 因謹按墨洲多民政之國其不以爭位致亂者惟美而已祕魯之爭總統至於兵交於都城而智利又甚焉然美於舉新總

統之年南北黨之相爭雖未用武其莫能相下固已無所不至數
十年後美其如拓拔之南北朝乎

八月初一日 元吉附

本日美國接駐上海領事電言中國宜昌地方會匪又焚劫洋人
請添調兵船往中國云 歐洲電傳法國自割地求和於德常懷
復讐之心近日法人昌言現在本國兵精糧足軍器齊全報怨宜
趁斯時不得遲待德人聞此亦有戒心卽已設備德皇卽於本晚
赴奧國閱兵與奧王相陪護商一切云 因謹按從前法皇拿破
侖分裂布國限以不增兵額不增礮臺若非師丹一戰布不國矣
起釁之由固在法而不在德也是役也法皇擄法都破殺傷共五

十萬人法國割來因河以東之地以求和賠兵費計銀七萬萬兩
德以是稱霸而法遂失其雄法人恥之迄於今二十四年矣法人
果能報復乎抑託空言乎如法必加兵於德是又爲戎首也民生
之禍亟矣

初二日晴中夜大雨徹曉

本年四月巴西國駐紐約領事招猶太人赴巴西作工昨日猶太
人四十三名由巴西返紐約言巴西工價每日給銀一角七分不
足敷用而伐樹割草其工甚苦故美國駐巴領事爲之載回以猶
太人已入美籍也 因謹按入美籍者其利益如此無怪歐洲來
美之人均入籍也巴西之待客民如此光緒七年巴西國會遣使

至中國求立約招工幸政府准其立約而不准招工否則蹈猶太人之覆轍而無以載回則與以前自赴祕魯之華人無異矣

初三日晴夜中大雨傾盆至五更而止

昨日倫敦來電云德法奧三國大軍向來每年大操一次今值操演之期三國大軍同時調動一似有戰事者歐洲人民頗爲驚疑云 因謹按德與奧已聯盟相助以拒俄法法人又有與俄聯盟之事以防德奧之聯盟且又昌言欲乘此時以報德國之怨閱時數日德與奧同時調兵法亦調兵旁觀因疑其有戰事而不知其實合操也因意德奧合操之時法之視國者必隱觀其軍容如其不壯則法將興報怨之師商書之所謂兼弱攻昧也如其實壯則

法當緩搆兵之議周書之所謂度德量力也此可悟交涉之道矣
國勢強則敵國隱弭其覬覦國勢弱則外國顯生其叵測而強弱
之勢並不待戰而始知也其綢繆未雨哉

初四日晴

美政府以駐上海領事來電言中國湖北省之宜昌府城又有會
匪焚劫教堂洋人逃避雖未傷人而財產悉遭搶掠遂擬添派兵
船因急命車赴外部查問以是日係外國禮拜外部不到衙門乃
改明日 因謹按哥老會匪我中國之大患也其人皆游勇及流
徙無家產之民故好有事其焚劫教堂者欲中外之開釁得以乘
機爲亂耳州縣姑息養姦率事隱諱每一教案出

朝廷賠款十餘萬至數十萬不等而不盡參劾示懲宜會匪之日
賊也

初五日晴

午刻赴外部衙門見署外部大臣華頓先作寒暄語然後敘及公
事問曰九月三號新聞言貴總統貴大臣因中國宜昌地方有會
匪滋擾洋人一事擬添派兵船三艘赴華信否外部答曰宜昌會
匪已懲辦否因答以此時尙無確信然我政府斷不容漏網也外
部曰前此各處會匪滋事中國辦理從嚴此次當不寬縱我國亦
稔知之故添派兵船一節雖有請者已作罷論因領之遂辭出
聞美國已認智利議院黨爲新總統

初六日晴

初三日倫敦來電云俄廷商籌巨款法國巴黎銀行允借銀一千二百萬磅每年四釐行息又云本日法軍大操法國外部大臣已請各國使館人員同往閱操又云聞俄國政府已添派兵勇十五萬人赴波蘭省之戈梭埠防守查波蘭往日係自主之國地在俄德奧三國之間嗣爲三國所滅瓜分其地此埠係形勝之地故俄添兵設防共計有戍兵五十萬云 英國以印度人爲兵駐防緬甸者每百之中患病者有六七十云 俄國核計西比里阿與其東方所採之金自西歷一千八百三十四年至一千八百八十七年計之有二千九百八十二萬五千兩黑龍江各處與潑立冒司

紀地方所採之金在一千八百八十八八十九兩年一有二十萬三千兩一有二十四萬二千兩合前所採總計之共得三千二十七萬兩 因查古之金價不若是之高也卽中國二十年前之金價亦不若今日之高也其故由外洋各國皆用金錢故金不敷鼓鑄而價日長耳西比里亞爲產金之區其實奉天黑龍江皆產金之區也外洋均於上海購中國之金若開採得法我東三省豈讓美國之富饒乎

初七日晴

美兵官來謁談及近來德法兩國均已各增兵額上年德國增兵十九萬五千五百零二人內四千一百二十一人係充水軍法國

增兵二十萬四千人較之德軍多增八千四百九十人 因謹按歐洲各國蓋無一日而忘戰也時而增鐵艦時而增槍礮時而增兵額時而增戍守蓋卽以己之心度人之心知我之所日夜淬厲以期抵人之隙乘人之閒者敵國亦猶是也勢不均力不敵則外侮乘之此所以休兵無日而稅斂日苛也然亦爲騎虎難下之勢無可如何矣

初八日晴

昨日德國伯林來電言俄皇現遊丹京前擬由德國返俄順道與德皇相晤一節此次已電知德國政府不能如約矣想俄法兩國近日結好情形層見疊出俄皇恐與德皇相見難於措辭故託故

由丹馬返俄云 因謹按歐洲諸國君臣機心機事無日無之亦其所處之地不得不然也我

國向以坦白待人無詐無虞去古未遠然以此交涉多失便宜易曰無有遠近幽深遂知來物左氏曰民之情僞盡知之矣古人早有見及之者但熟觀戰國策則得其端倪矣

初九日 晴天氣漸涼

美國軍械所人員言近製就無煙火藥昨日驗用與各國所造者不相上下查歐洲各國無煙火藥其製法不令人知今由本國水師部化學博士留心考究多時近來始能自製云 因嘗謂泰西各國開礦之利製器之精其原皆由於化學也化學既精則持源

以往惟所用之無不如志講洋務者亦盍探其源乎

初十日晴

美國副戶部大臣查英美交界地方華人潛入美境一事茲據英屬可倫比亞之云古華埠關吏稱自本年正月一號起至七月十五號止華人由華抵埠者計七千九百人其中赴美者約百之九十五云云因查英美界限山云古華埠至滿里奧阿計千餘米其間處處可通而北達哥他省北界自西徂東計數百米之遙看守人員祇乘馬巡捕六名又敏他拿省之北界計五百米並無一人看守且有引帶華人入境者擬下年與議院商設法以嚴防之因謹按自古無久而不敝之法不以窮變通久之道濟之雖聖人

不能治也美之立國也聽客民之入境中國之立例也禁華人之出洋乃至今日一則立例以限制入境之民一則設官以保護出洋之民且一則欲限制而不能一則欲保護而不盡非立法之有弊實時事之變遷也是於沈幾觀變之士不反古亦不泥古

十一日晴

美外部接美國駐華公使電謂近日會匪在宜昌鬧事美國教堂被燬水師部仍擬添派兵艦赴中國保護教民現有泊紐約之兵艦名白脫釐耳卽令赴華又英報言湖北漢口地方幾釀事端幸英兵艦調兵帶格林礮登岸彈壓會匪寒心事遂解散云 因謹按會匪爲患日甚一日由其黨羽潛多蔓延日廣也前此地方官

竟無能清其源者其劫掠本國商民則事掩飾其焚搶外國教士則事賠償掩飾則百姓含冤賠償則庫款支絀均於民生國計有妨因警疏陳矣惜乎至今未已也

十二日晴

初十日柏林來電言俄國欲取土耳其都城人所共知近數年來謀此不遺餘力現俄國兵弁假冒工商在土國都城刺探虛實但伺其無備卽調精兵三萬人襲而取之云 因謹按俄人二百年來無日不以蠶食鯨吞爲事歐亞兩洲小弱之國鄰於俄者俄實盡之茲歐洲尙有土耳其阿富汗勃爾加釐亞羅馬尼亞希臘波斯等小國亞洲只有朝鮮日本兩小國俄人之意未嘗一日忘也

數十年中當不能無忽諸之恨者矣

十三日晴

辰刻土耳其都城來電云本國米地林之昔搯力島英鐵艦已派兵數隊帶格林礮數尊上岸踞之該島之名卽改爲君亞英吉利取當今女主所有之義從向例也此島係米地林之緊要海口英水師將於此爲米地得藍尼之英兵船會集之所並資屯煤 因謹按此英人之所以敵俄也俄覬覦土耳其謀襲取之英保護土耳其謀密防之其事並不著迹如國手之碁兩相牽制而絕不露攻劫之形俄人蠶食之謀其庶幾稍緩乎

十四日晴

四號報云聞法國現調兵一隊屯紮德國邊界德國亦調兵防之
法國水師兵艦一隊駛往康斯日城時俄王特命該城俄官優
禮相待並自行設宴款待法水師提督一切武弁毫無閒言不知
何故法廷忽有廷寄飭本國駐土公使暨統帶水師提督嚴防俄
人佔據康斯日體拿怕爾都城云 因謹按歐洲之勢蓋無日而
忘戰也其外修玉帛之會如古之覲遇朝宗也其內修矛戟之威
如古之蒐苗獮狩也必使勢均力敵而後可以立國乃可以安民
所謂以戰止戰其用心深矣

十五日晴

是日設醺 倫敦來電云土耳其國政府已告英之駐土國公使

日

記

卷八

名外衣德言以昔稱力島之事英使答以不知及固詢之則云此或英之水師上岸操演以期得力耳 因謹按交涉之道於此宗公案出使者斷不敢漏師多魚不知爲不知理固應爾即使知之而推爲不知亦理應爾非敵國之所能責備也爲土耳其計當求耳目之遠偵探之廣不宜與羊謀羞與狐謀矣

十六日晴

英兵艦佔土耳其之昔稱力島本日又聞該上岸兵隊是晚已登舟且該兵艦已開往麥馬力多地方矣 墨西哥國駐美公使已調回現由參贊代辦交涉各事 是日美總統由避暑之地回華盛頓 因查美國自總統以至各部議院無不出都避暑逾三月

而後回而事不叢脞者簡也簡則節目不煩而弊亦不多凡立法以救弊者不知所立之法即弊所由生也美國之爲治可謂簡矣未嘗無弊而弊不至於甚者則上下毫無隔閡之故也

十七日晴

法國游歷人員來見言昔曾至中國者因訪以近日德法時事據云近日德皇在本國麥爾好生地方閱操第十隊與第四隊軍分爲攻守之勢第四隊爲提督亨尼書所領以大礮置格爾哥夫山顛而列隊於山麓以迎敵第十隊係男爵紐老漫統領爲攻敵之勢均川無煙火藥故只見火光而不見煙閱時既久乃罷具見認真講武法國現亦操軍矣談逾時而辭去 因十年前在京供職

時聞德國操兵而法人效之德國乃創爲夜操以後又未聞焉今則操無煙火藥之用此藥創未數年蓋既得風氣之先而遂欲精習之以適用也

十八日晴

昨日英國駐美國公使彭士芬照會美國外部以今年英美所訂合同在祕林海捕獵海龍不得逾七千五百條之數今美公司已逾其數而貴政府不禁有違合同定章云云 因謹按美國之專利可見矣其始假仁仗義謂英人捕海龍太多恐類竭澤而漁以致不能蕃息而議禁捕致拘英之漁船乃以英政府執言詰問遂爲模稜之說限以額數淺者視之必謂美人之仁心仁術矣今乃

自逾其額致啟英人詰駭然則美國前此所云恐其竭澤而漁以
致不能蕃息者乃假託之辭實欲拒英之捕以自專其利也各國
交涉用意大抵如斯無以防之則脂膏暗耗歷久豈有不貧者哉
十九日晴

美國軍械所以近年各國所造礮彈愈出愈利雖堅厚鐵甲亦可
洞穿必得一物見水卽脹大多倍自然閉塞所穿之口使水不能
入則船不致沈因查得一物名舍有螺螄者殊合此用丹國巡海
兵船名協拉者現已試驗知其可用云 因嘗聞臺灣基隆之戰
法人預測量中國之礮口礮彈先爲木楔以備衣裯之用今丹國
乃又思出自然閉塞之法則船雖洞而無妨不得謂非巧也然亦

僅防實心彈而炸彈終不能防也

二十日晴

法國兵船向來轉動大礮裝藥入彈等事其連機器均以水力近
電學家考得以電氣運動較爲靈便擬一律改用電氣云 本日
美總統派下議院紳馬羅爲嘉省北方按察司 因謹按馬羅最
惡華人前此請立新例迫令華人領照其無照者卽逐出境又上
條陳言中國除公使之外一概禁絕不准來美其求見好於工黨
久矣總統派爲刑司信乎聲應氣求一鼻孔出氣也

二十一日晴

本日美政府接俄國電云俄國今年歲荒收成甚薄且有數省亦

地無收現在下令禁止糧食出境并招商來美國且是埃及國採買糧食接濟云云 因謹按俄國之荒甚於中國前此河南山西之荒而尙不憂餓殍者鐵路之力也然至於收成之日而卽爲乞糴之謀其歲歉亦可想矣中國北邊一帶毗連之處俄人或無暇開邊也夫

二十二日晴

美國近來整頓水師添造兵艦試礮驗甲不遺餘力現造新式兵艦多艘次第告成保守本國海口可恃因籌及遊弋重洋必有添煤之地上年曾特派公使赴奚提國近古巴求給毛山尼克拉司一地該國不允茲聞美政府欲以鉅款購聖駝馬島於丹國查此

島居南北兩墨洲之間前此二十三年美國曾與丹立約願以美銀七百五十萬圓購入版圖嗣以議院不肯撥款而中止茲又與丹國婉商事關軍政議員當不再阻撓矣 是夕接倫敦轉到總理衙門電言英人黨於會匪爲會匪私購洋槍三十五箱且屬告美外部 因謹按洋人之嗜利無忌其積習然也中英通商條約本有不准販運藥彈槍礮一條然違者不過入官外國刑律至輕犯者不過監禁是我之受害重而彼之受患輕欲其不犯固不能也惟稅關之稽查能使絲毫無遁則彼無可得利庶幾不爲冀以此杜之耳

二十三日 晴天熱

午刻赴美外部衙門見署外部華頓告以鬧教之事實係會匪前
十二日中國上海稅關查獲私運洋槍三十五箱乃由香港運至
鎮江者係英人梅生經辦又於梅生行李搜出炸藥五磅梅生爲
鎮江關稅司幫辦當卽解滬據供英人愛司美在香港代鎮江會
匪購辦軍火內有頭目爲英人泰山另有洋人六名均住虹口總
署已照會英使速飭領事拿訊云云華頓云中有美人否因答曰
似無華頓曰旣無美人我可放心矣因遂詢前貴大臣言不添派
兵船至華似聞又有添派何也華頓云前未聞宜昌之事以爲中
國會匪已靖今聞宜昌會匪兇熾甚熾故略增一二淺水之船會
匪如此猖獗我國向來有兵船五六艘往來中國豈可此時尙少

於前如有過於受虧之處致傷兩國交情事後之爭論不如事前之綢繆也可共諒之因遂辭出

二十四日晴

聞律師已回遂往謁之告以戶部新章不肯認前此金山領事所給華商來回之照又立例以後金山紐約不得給照給照必由中國政府此例甚苛前曾電請速商之戶部戶部意見如何律師謂前得電時卽函致戶部言戶部於前二年已許華商由金山領照作爲回美之據今領照者已有四五千入而忽然不認此照是不信也不可以告人戶部已允前此之照仍准返美當電飭金山稅關矣至自九月起以後不得再發此項護照卽有亦作爲無用矣

因謂給照一事前此本已訂定今又立例廢之理應駁詰律師云
立例爲防弊也因有弊端故立例防之例既立定雖駁何益因仍
執前說律師云俟緩商之因遂辭出

二十五日晴

因今年春赴祕魯值智利國內亂寓居該國之華人求爲保護因
遂謁駐祕魯之英公使託其電駐智公使代護華人英公使允之
茲接駐祕代辦吳溶來函言此次智利之亂英公使爲旅智華人
身家財產開單照智政府如有損失則請賠償故此次智亂經年
華人尙無受虧者云云因深慰焉 因謹按光緒七八年間智利
與祕魯交關華人之死者五千餘人損失財產鉅萬無卹無賠可

爲恨事此次智利內亂不過一口舌之費轉託英使遂能處險如夷其機括與巴拿馬厄瓜多同而華人之受益則又過之豈不幸哉

二十六日 晴小雨

美紳某言近日法國各軍大操各國政府均派武職大員赴閱德國武員閱後函致本國政府稱法國步兵分隊而戰進退整齊練熟之至及其合隊而戰行伍井然氣象雄壯頗合古時希臘國之步隊云 因謹按烏孫希臘埃及猶太波斯其立國甚久蓋舊邦也烏孫卽俄羅斯之轉音自漢至今日漸盛強波斯尺土尙存未必能久猶太民已散至四方希臘終當入俄埃及終當入英希臘

古時步隊德人稱之則亦往年一強國也今不然矣盛衰倚伏治亂循環考古者以之喻喻治國者宜爲殷鑒焉

二十七日 小雨晴天氣轉涼

美國與夏威夷國前所立報施條約夏國土產至美國一概免稅美國則以夏國所管之普爾夏巴地方爲美水師船錨并准美國官兵隨時隨便來往夏主已允而其民則以爲如此報施似夏國已歸美國保護故夏主不敢批自女主卽位遂背美向英美國亦不免夏國之糖稅夏商苦之現美國又設法與夏請申前約云因查美國已擬購丹國之聖駝馬島又求海帶國之海口今又求夏威夷之普爾夏巴無非注意兵艦添煤之地欲其水師稱雄於

墨洲耳自英之兵艦天下莫強而商務亦極盛美誠富矣而強則不及故英義多侮之此其所以綢繆未雨也夫

二十八日晴

二十三日倫敦來電言俄皇與衆軍官正整飭水陸軍士兵馬糧草以備出師至土耳其都城因聞其宗室某公主訃音而止 因謹按此必有他故也果欲出師斷不中止且所以中止者非大故也軍情秘密傳聞異辭仿春秋之例疑以傳疑可耳

二十九日陰

昨日新報載亞洲之中俄國之西北里亞英屬之印度中國之新疆三國交界之地地勢平衍名爲巴美爾近爲俄國所踞英國屢

派武員前往偵探防俄人之侵印度也茲俄京來電言英廷如再遣員赴彼查勘必啟釁端云 因謹按俄人蠶食各國之地蓋無歲無之也此次所踞之地可以窺中國之新疆可以窺英屬之印度厝火積薪待時而發無以禦之則俄人又得遂其蠶食之心其綢繆未雨哉

三十日晴

外部總辦來見言中國曾匪陰謀藉焚燬教堂以起事英國奸人干預其事故爲代購軍器中國官員亦多干預其事者聞有某道員之子與會匪來往業已十年公館中藏有洋人衣服數十套以備臨時應用云云 因謹按湖南道員周瀚著書闢教固以人心

世道爲憂而惜其不能審時度勢也某道員之子結曾匪製番衣兼入會教誠不知其何心然或者少年無行其父或未知也從前林清倡亂內監尙有通者會匪以入會惑人邪僻者多信之地方官吏如時時查察何至蔓延也哉

九月初一日 元吉附

歐洲東境保士波海口俄國戰艦之在黑海者出洋必由之地英營與土耳其立約以重兵守之不准俄艦出入茲因土國有小島在歐洲之南前爲法人所踞英人爲之奪回而索兵費土國乃將該島交英暫管准其收稅收滿交還現已收滿英人尙未允還土王卽照會俄皇准其兵艦出入保士波海口俄皇大喜現聞英廷

急於地中海等處設防云 因謹按地球各強國無不以侵佔土地爲心俄人注意於鄰封遠交近攻之計也英法德美注意於屬島長駕遠馭之謀也兵艦以煤爲氣力無煤則不能行越國鄙遠兵端一開則局外之國當守局外之公法不得接濟以煤此所以注意於島也此謀國者之深心也

初二日晴

仰光西報云現法人已踞暹羅國之呂汪及不林望兩處地方查法人久已垂涎越南暹羅越南已得欲猶未厭所踞之地已逼近英之東印度俄國又開拓至印度之西北兩強國由三面而來爲英國計宜力助暹羅無使他國踞暹以爭印度查該處有江楓地

方爲暹羅要隘英宜踞此以阻法軍 因謹按暹羅向貢獻於中國修藩屬之禮近年以來漸攜貳矣其地與越南緬甸接壤故英法兩國皆垂涎英人則謂已入牢籠不畏他國之攘奪法固不甘心也將來兩虎爭一羊分裂不勻其不免戰事乎然而法固非英敵也水師不如英也

初三日 晴夜雨轉涼

本日報言小呂宋之東有羣島名嘉羅蘭者日屬也美國教士向在彼傳耶穌教而日國向重天主教故島民屢燬教堂虐教士地方官以教士非同教之人不爲保護美廷曾照會日國駐美公使案懸一年未結美廷遂向日廷索償聞日廷以美國教士所傳之

道非日國例所准將請美政府撤回教士至於已往之咎日國不能不認焉 因閱此而歎洋務之不可不熟也教不同者不能相強以傳道故俄以女配英儲曾先訂明俄女自習希臘教英儲自習耶穌教不相合也亦不相妨也我中國自奉孔子教耳自成豐十年之約泰西以設教要求當時無知洋務者以不同教拒之貽禍至今致外侮糜庫帑傷國體過此以往猶未已也可勝慨哉

初四日小雨

智國內亂甫靖英德義日等國公使擬向智廷爲本國商民損失財產者索賠約共美銀二百萬圓云 因謹按古之邦交皆盛言救災恤鄰之義今直幸災樂禍焉耳國弱則召外侮內亂亦召外

日

記

卷八

二十九

侮戰戰兢兢日慎一日庶幾免於今之世乎

初五日晴

聞會匪鬧教之案蕪湖一處法使索賠銀十一萬兩且須割教堂以後之空地及山界之云 因謹按自洋教入中國莠民多歸之其平居無事莠民則藉教士之勢以魚肉善良至激成事端教士又藉該國之勢以囑咐官吏所求必得所欲必遂匪特國帑爲之虧國體亦因之喪可惜哉

初六日晴

金山總領事詳言戶部新例爲省察院批准華商不便擬卽上控請向律師科司達熟商遂訂見於午初刻比往則墨西哥派往日

本之公使已到因先見商所以駁之之道律師謂立例已定駁亦何益因謂當援約以駁之蓋例者美一國所立約者中美兩國所訂中國可以不循美國自立之例美國不能不遵兩國共立之約也律師言外部布連尙未回署外部無此權因言布連月底可回中國公事合先預備故先商之不得再緩律師謂且先商之戶部察其意見如何再照外部方不造次因許之遂返

初七日晴

美國認真整頓水師事屬創始製船鑄礮利弊不能洞悉兵部謂現在造成之兵艦如渣爾斯頓之類者有六七艘費鉅而不合用以其甲薄而不能禦彈行緩而不能及人且需煤甚多今擬不再

造矣水師部謂以後造船只用三式一則甲厚礮巨足容萬噸可
敵他國上等鐵艦已定三艘告竣尙遲二則厚甲巡海船駛行必
速以爲緝捕敵國商船之用三則小礮船容一千噸爲行淺水之
用將來造齊雖英國水師來攻亦無能爲矣 因謹按此可以窺
美國之用心矣美爲自守之國向不以兵力佔他國之地而各國
水師之強於美者輒陰以兵力脇美如現在之英國義國是也故
其所言振興水師者並無鄙遠之心但謂英之水師來攻亦無能
爲則義更無論矣此美人心也

初八日晴

軍械向以鐵制德國以其質重而難運動擬代以鑒精現向美國

和爾士公司購川計銀十萬圓查鑿精係山自鑿化出似鐵而較輕 接總理各國事務衙門文爲墨西哥國立約事卽札飭金山總領事查明詳細情形 因謹按墨西哥之求立約與巴西同爲招工耳旣爲招工則約可不立矣然我能拒其立約而難禁其招工卽能禁其招工而不能盡禁華人之往至於華人之往者日多或被欺陵而求保護則後時之立約補救又不如先事之周章也此最要也

初九日 小雨

本日新報云俄國商人以各國貨物由黑龍江運入境者須增稅則應於該處擇地設立稅關且西比里亞鐵路將成將來貨運必

盛應加增入口之稅以保本國利源 因謹按俄國之兵強矣而富尚不敵數大國者振興商務不如數大國之縝密也今亦漸講求矣所以開西北里亞鐵路而於瀕太平洋設船塢者蓋非僅長駕遠馭而亦期通商也惟黑龍江係中國地方而擬於各處設關收稅已欲強富而侵削鄰封乎然而俄人損人益己之心固不自今日始矣

初十日 陰 天氣轉寒

美國製造局言近有炸藥一種名火地市者其性極烈現在法國之黎埠試驗其炸力比尋常炸藥加至四十倍云 因謹按泰西各國爭勝其習然也然軍旅之事特患其不爭勝耳槍之由前入

藥彈者改而爲後膛矣又改而爲來復綫矣礮之三五千觔者改而過百頓矣船之鐵脇者改而爲鐵甲矣不知者以爲奇技淫巧其知者以爲出奇制勝也平心而論易地以觀不視其所言視其所行不察其立言察其立國強弱之勢勇怯之形不可掩也焉可誣也

十一日細雨

前聞美國博士有能致雨者因不信茲閱初八日報言美國西南諸省曠地旱多雨少故不能犁茲有博士講求氣學於風雲往來潛心考究因得繫雨下降之法呈諸議院議員以事關農政撥銀九千圓俾資試驗山農部派員偕往常旱之箇沙司省該博士以

氣球炸藥空中轟放立即雲行雨施屢試屢驗徧灑數十里至數
百里不等云 因查外國之輪船火車電氣燈德律風電報氣球
其初創也人皆不信致雨之法因亦不敢信也惜未親至其地觀
之

十二日晴

俄法二國聯盟立約已一年餘近又續議增添多欸以期周到兩
國政府不日可以簽名其續增之約尤爲祕密各部大臣均不與
聞云 因謹按當今之世非力敵勢均斷難立國也德義奧合縱
以防俄法俄之地利險阻自守尚可無虞然水師則不能敵三國
矣法之強不如俄非但水師不能敵三國陸軍亦不足自守然則

俄法之連橫亦事勢之不得已者乎

十三日晴

法國代辦公使戴布萊謁見談許久而去 聞美國水陸各軍所需無煙火藥向來購自歐洲茲美廷以不能自造既耗公帑將來如有戰局歐洲守局外之公法亦不能來擬在賓省富蘭科埠設局專造無煙火藥并炸藥已由各製造廠爲造造火藥之器具矣 因接凡槍礮兵船不能自造而購於他邦者昇平之時似便及有戰事則必掣肘蓋萬國公法兩國交誼則別國應守局外之例無所偏袒甲申中法之釁德國先爲中國所造鐵艦雖已造成仍不肯交此前事也至於銀錢流入外國以致國帑空虛又其次矣

十四日晴

各國公使於墨西哥使館商輓德公使事惟俄使未到英公使彭士芬創言先發公函唁之將來如何送奠再行通知質之各國公使均以爲然遂散 俄儲之赴日也日君犒其從者一千圓茲俄儲抵國後電滙五千圓爲賞日本官員前充接待侍從者 因聞俄儲之赴日本也日人歎之費銀十六萬圓豈祕之不使人知歟奧之待俄儲也可謂盡禮然不久而俄兵卽逼奧界焉立國之道以自強爲第一著以交鄰爲第二著其庶乎

十五日晴

謁法代辦使事戴布萊寒暄之後因訪俄法聯盟之事該代辦言

未與聞故不知詳細然總有益於歐洲昇平之局云 聞日本朝廷近於朝鮮國事最爲留心且云無論中國俄國把持朝鮮朝政日本必爲中理云云 因前聞日本因行刺俄儲一事畏懼之至遂宣言將來俄國如有事於朝鮮日本決不掣肘是所以媚之者至矣今乃又此言因決知其僞也否則直指中國而言而連類及俄耳狡哉

十六日晴

聞俄國所佔亞洲巴美爾之地已侵中國之界中國已山公使詰問而俄兵又犯阿富汗地方英人憂之茲聞俄兵又窺羅馬尼亞國已紮營於該國境上羅國嚴緊設防云 因嘗謂俄之國勢實

七國時之強秦也比鄰小國歲有并吞歐洲雖合縱禦之但能保全土耳其阿富汗其他究鞭長莫及也然蠶食漸近將來土阿兩國終不能保何英德能制拿破侖而不能制俄耶則國事異也
十七日大雨至申而止日出

十一日倫敦來電謂前三日俄國有鐵船名拿伐林及半鐵艦名底尼同日試水尙有礮艦一艘不日亦可試水水雷礮艇數艘黑海所需兵艦現已興工製造俄國於加增水師可謂認真云 因謹按俄之兵額至二百三十九萬人而讀書者不過十中之一可謂重武輕文矣乃其國勢日強版圖日擴幾於縱橫無敵焉則不得議其計之非矣豈風會使然耶亦形勢足恃也

十八日晴

金山領事來電云金山稅關又附會戶部新章不准持照商人上岸請速設法當卽函致律師往見外部外部立照戶部戶部許電稅關准華商登岸但須具結候總察院核定戶部新章如何再爲定奪遂電金山領署以戶部之意詳示之并發一函

十九日晴大雨微曉

新報云俄人數百名往中國之西藏遊歷俄人之遊歷者屢矣其母乃有窺伺之心乎 因謹按我 國家之於西藏特設大臣經理較之琉球越南不同他國有窺伺者可援公法拒之

二十日晴

美國新創電氣輪船不用水火專以電氣激動機器其行之速與
川水火相似轉折亦靈聞已帶至中國矣是美國又闢一利源也
因謹按美國之川電氣以之行車以之行舟又以生馬力至九
百萬匹以運機器而供製造聞傳聲筒亦係電氣能以人所言者
留諸筒中寄至萬里之外存至十年之後啟而聽之如親聲欸其
用神矣

二十一日晴

金山總領事來文工黨欺凌華人以萆麻油塗其身並毀其室卽
將案交律師 昨日俄彼德堡來電云該國新製鐵艦名拿伐林
那容九千五百噸長三十三丈馬力九千匹猛駛每半時可行十

六海里鐵甲厚十二至十六英寸架十二寸口大礮六尊六寸者
八尊速放礮十尊放水雷之管六具已下水矣又有鐵艦二艘一
名格來也是居一名阿伐尼稍小亦已下水 因謹按俄人鐵艦
日增彼德堡在歐洲而亞洲地方無添煤之地此其志在歐洲可
知矣

二十二日晴

本日新報云美國賽珍會戶部已商之律政大臣據律政大臣斷
定謂各國赴會帶同巧手工藝幫辦事務不在禁止各國合同章
程之內中國赴會帶同華工幫辦會事者應不准上岸云 因謹
按此顯有軒輊之見也各國之工則以巧手別之所以爲入境地

步也中國之工不言巧手所以爲不准上岸地步也欲蓋彌彰矣
二十三日晴

夏威夷國女主之父名刻來鶴來美修好總統及外部與之宴婉
詢曰聞貴君主親英而疏美何也刻來鶴答云地球之上與美最
鄰近者夏威夷耳英則隔大西洋矣焉肯疏近鄰而親遠國乎總
統嘉之 因謹按美君臣之結好於夏威夷者籠絡之也太平洋
之島國夏威夷爲近美如有事亞洲亞洲有事於美兵艦於中途
添煤惟有該島所關係者大矣此美之所以厚禮該使也

二十四日晴

昨日俄國彼德堡來電言俄國出口之糧食太多適值歲飢遂致

不給此時待哺飢民已有十三兆人口云 因謹按俄人好武合
乎大兵之後必有荒年今無食者至一千三百萬人不知何以賑
濟俄如因此休兵息民固俄民之幸而亦鄰近各國之民之幸也
二十五日晴

十八日報載俄人侵踞巴美爾地意在兼并中英兩國已詢之茲
據俄京來電謂英俄兩國爲爭亞洲土地常有齟齬現爭巴美爾
之地正宜乘時一決勝負以善其後云 因謹按此可以知俄人
之心矣亦可以見俄之強矣其心以兼并爲事出諸口而無忌憚
者習焉不怪也歐洲強國無敢與英爲敵者法之搶攘爲傑猶降
心於英焉則其他無論矣乃俄人昌言之而英人受之此可以規

國焉

二十六日晴

某教士及武員來謁談及俄法聯盟法國提督赴俄俄人盡禮相迎至於破格行啖口昇肩之禮實因俄國所佔土擔保路城係法國屬地欲法國不索回云 因謹按俄國處心積慮固無日不以兼并爲事也其於弱國之地如取如攜無敢與校矣法雖不如俄之強然其水師固非俄所能敵也俄雖奪其地而不能不懾於中故爲此卑禮降心之舉乎

二十七日晴

午刻赴外部衙門見布連寒隨甫畢因言自光緒十四年美國自

立苛禁限禁華人經前公使張蔭 照會駁詰本大臣莅任具文
駁詰者凡五次又兩年矣貴大臣意見如何應請照復布連曰苛
禁之例本大臣亦不謂然乃商之總統及議員迄無端緒故未能
復因曰今我總理衙門屢次函詢實難再緩幸連商之布連曰現
在必當急議以期報命因又詢中國教案均已嚴辦美國尙派兵
船赴華何也布連曰前所派者已留紐頓一艦不令開行且亦不
再派矣美國必不爲難也因遂辭出

二十八日晴

美官武弁談及英皇之孫英儲之次子名佐治者六部派充安身
鐵艦管帶查此鐵艦容一萬六百噸馬力一萬一千五百匹弁兵

五百八十人巨礮十門海軍中巨艦也 因謹按英之太子前曾
遊歷歐洲并至印度光緒十六年又遊亞洲至中國日本矣今其
子又充兵船管駕亦如殷之高宗學於甘盤遁於荒野閱歷深而
見聞廣也宜其強也

二十九日晴

智利議院黨戰勝卽位後曾派兵看守美國駐智使館茲美國兵
艦水手上岸又被殺傷多人美公使照會智國外部外部覆辭不
遜美廷已議調撥兵船赴智問罪矣 外部大臣布連答拜 因
查美國駐智公使於智國內亂不守局外之義而干預其事故議
員黨卽位後卽笞辱之然智非美敵也徒洩一日之忿以快一時

之心美國國體所關如與爲難則是一波未平一波又起矣

三十日晴

輪船公司律師來見爲華人來往之事也詢及英政府以俄人侵略亞洲之巴美爾地方將不利於印度請諸中國准其在新疆之喀什噶爾地方添設領事及武職大員各一名駐紮於彼信否因答以未接我國政府公文不知果屬實也律司又言英廷已飭印度總督練兵嚴防又令沿印度西北邊界一帶火車鐵路歸英員管理以便轉運矣 因謹按巴美爾當係不毛之地古所謂甌脫者也俄人好蠶食故樂得之以擴其邊英人善防俄故嚴備之以遏其勢但使俄不侵阿富汗英決不因此而興戎也此可料及者

日

記

卷八

三十九

也